

Damain accidents – dapli morts

Grischun: Statistica accidents stradals

DA GION NUTEGN STGIER / ANR

■ Sin las vias dal Grischun èn capitads durant l'onn passà 2220 accidents da traffic. Quai èn tuttina 68 damain che l'onn precedent. Tragic è il fatg ch'ìls accidents sin via, cun ina fin mortala, èn s'augmentads. En tut han 19 persunas pers lur vita sin via. Il dumber da las persunas blessadas è s'augmentà levamain. L'onn 2017 ha i dà en il chantun Grischun totalmain 2220 accidents da traffic registrads da la polizia. Quai correspunda pli u main a la media dals onns 2012 fin 2016 e dastga vegnir considerà sco positiv sch'ins resguarda ch'il dumber da vehichels en il chantun Grischun è creschì er l'onn passà per circa 2100 vehichels a motor. Quai ha ditg ier *Barbara Hubschmid*, la scheffa da la polizia da traffic dal Grischun, a chaschun da la conferenza da medias a Cuir. Ils accidents che na vegnan betg annunziads a la polizia na sajan betg registrads en la statistica, ha cuntinuà Hubschmid. A maun dal dumber d'accidents vegnian definidas bunas mesiras per prevenir accidents. Cun agid da questas cifras fa la polizia chantunala dal Grischun in'analisa dals accidents e da las ristgas ed eruescha uschia il basegn d'agir,

In augment da 36%

Ils accidents cun donns da persunas èn creschids per ca. 3,5%, tar quels cun donns materials ha pudì vegnir constatada ina reduzziun da 4,7%. Allegraivel èsi che main persunas èn vegnidas blessadas grevmain (-5,5%) en cumparegliazion cun ils ultims tschintg onns. Cun totalmain 19 persunas disgraziadas mortalmain sto vegnir cumprovà – en cumparegliazion cun l'onn precedent – in augment da tschintg (+36%). Cum-



Barbara Hubschmid, la scheffa da la polizia da traffic dal Grischun, cun il pledader da medias Roman Rüegg.

FOTO G.N. STGIER

pareglià cun ils ultims tschintg onns po vegnir constatada ina diminuziun leva, ma cuntinuanta tar ils accidents da traffic ch'èn vegnids chaschunads sut l'influenza da narcotics e da medicaments sco er tar ils accidents chaschunads pervia d'alcohol.

Adina damain accidents da traffic sin autostradas

Dals 2220 accidents èn succedids 1357 sin vias principalas. Er sin las vias lateralas èsi vegni tar intgins accidents, totalmain tar 610. Ils accidents sin autostradas sa diminueschan dapi l'onn 2012, ha ditg Hubschmid e quai saja in fatg positiv. L'onn passà èn quels schizunt sa diminuids per 22%. En 889 dals accidents èn involvads animals, cunzunt selvaschina. Tar 576 accidents da traffic èn ils automobilists sezs la culpa. 65% dals accidents da traffic èn capitads sin vias sitgas.

Sveltezza memia auta e distracziun sco ristgas

Il dumber dals accidents cun motos è s'augmentà levamain en cumparegliazion cun il nivel da l'onn precedent. Entant ch'ins ha stuì constatar in augment tar las persunas disgraziadas mortalmain (+2) è sa diminuid il dumber dals motociclists blessads (-7). Er tar las persunas ch'èn sa blessadas en in accident cun in velo u cun in e-bike sco er tar las pedunas e tar ils peduns blessads sto vegnir registrà in lev augment. Tar ils accidents mortals cun pedunas e peduns po percenter vegnir registrà in regress. 279 accidents da traffic (-20%) èn capitads pervia d'ina sveltezza memia auta. Sco indizi per la diminuziun po vegnir resguardada tranter auter l'activitad da controlla pli intensiva. La distracziun en il traffic sin via è fermamain derasada ed è ina gronda ristga. Quai demussa il fatg che circa 10% da tut ils accidents da traffic capitan pervia d'inattenziun e pervia da distracziun.